

八

樹溪居士集

膳錄監生臣秦溪

欽定四庫全書

樹溪居士集卷六

宋 劉才邵 撰

詔

賜科舉誠諭詔

案宋史選舉志云理宗之朝舉人之弊凡五曰傳義曰換卷曰

易號曰卷子出外曰賸錄滅裂廷臣奏防殿之策詔從之而不載紹興時有戒諭科舉之事考宋史全文續通繼載紹興二十六年正月殿中侍御史湯鵬舉言令科舉之法名存實亡或先期出題或臨時取號或假名入場或多金代筆孤寒士子不得與高甲富貴子弟皆得竊巍科乞申嚴有司革去近弊又載是年三月詔科舉諸弊委監司覺察重置於法當即此詔然則史

所稱五弊者高宗時蓋已有之不待
寶慶以後也此亦足以補史之闕云

勅門下自昔願治之君急於求賢以協濟事功而當時之士亦各務修飭以承休德用能發揮所學克副東求朕甚嘉之自即位以來率由祖宗之宏規屢下三年之詔詳延俊茂縻以好爵所以嘉惠多士可謂無愧於古矣是宜咸知策勵以稱所求而近年以來士風寢薄巧圖牒試妄認戶名貨賂請求重疊冒試逮至禮闈不遵繩矩挾書代筆傳義繼燭種種欺弊靡所不為不惟負

國家教育選舉之意兼使有素行負實學之人俱蒙其
恥一至於此豈所望哉夫待之厚則責之深出於禮則
麗於法儻名檢之全虧實自干於邦憲繼自今其克黜
乃心明聽訓言勿蹈匪彝以貽後悔在外委漕臣及監
司按察在內令主司覺察御史臺糾劾以聞當實典憲
務在必行故茲誠諭想宜知悉

賜沈該等為彗星消伏乞復常膳詔

案宋史全文續通鑑

紹興二十六年七月丁未彗星出井宿間上曰朕當避殿損膳以答天戒丙辰彗星沒丁巳宰

相沈該率百官拜表請御正殿復常膳不允表
三上許之宋史宰輔表沈該於是年五月自參
知政事除守左僕射
同平章事附識於此

省表具悉天心垂警蓋出至仁星變騰輝茲為大異既
震驚而增惕乃抑損以從宜避殿出珍懼災自貶已兆
廓清之應曾未及於浹旬永惟兢懼之深敢遽忘於責
已令光芒雖減星體尚在朕方側身省愆以冀消伏忽
披奏牘請復常儀式諒懇誠然非朕志所請宜不允
賜沈該再上表為彗星消伏乞復常膳詔

省表具悉垂象示人式表布新之意引愆修德敢忘念
往之圖永懷恐懼之深冀達精誠之感側身避殿菲食
去珍乃曲荷於監臨遂潛消於氛祲然星芒雖隱元象
猶著晨夕惕厲深俟退伏封章荐上殊悉忠勤尚不遑
寧難從懇請所請宜不允

賜沈該等第三上表為彗星消伏乞常膳詔

省表具悉天道無私方垂於仁愛星文示變初耀於光
芒惟謹告之甚明宜戰兢而增懼賴善祥之來應致大

異之頓消卿等屢進封章兼陳舊典願正位於當宁且備舉於常珍深諒乃誠勉從所請更期協濟益懋交修所請宜允

賜韓世忠乞住請給等詔

案宋史列傳紹興十二年四月秦檜收三

大將權拜世忠樞密使遂以所積軍儲錢八萬貫米九十萬石酒庫十五歸於國十月罷為醴泉觀使奉朝請進封福國公是詔乃為其乞住請給及歸還使臣官兵等事當是繳還軍儲之後請宮觀之前有此疏史未及詳耳

勅世忠省所劄子奏乞將今請給截日住支先蒙朝廷

差撥到官兵五百人數內將背嵬使臣三十員兼官兵七十人通作一百人還歸朝廷使用事具悉惟東漢建武之世優禮功臣全其封祿用能使之咸以功名延褒於後朕甚嘉之故推異數以答舊勲期無愧於古焉卿蚤列將壇輸忠王室陷堅却敵茂著雋功頃均逸於殊庭既備膺於褒典置兵衛以加寵厚祿秩以隆恩併示優崇於禮為稱乃存謙牧忽露忱辭雖嘉知足之風豈朕念功之意難盡從於冲尚宜深體於眷懷所謂背嵬

使臣三十人交割付殿前餘不允故茲詔示想宜知悉

賜張守忠辭免恩命不允詔

案集中有張守忠等降官二制皆稱

身列橫班而是詔稱舊弼是守忠乃曾居政府者而宋史宰相表不載其名考紹興時張守嘗再簽樞密參知政事再奉祠後以建康重地須用大臣有德望者鎮之以守帥建康數月薨或守守建康時有此恩命故稱舊弼而傳寫誤以守為守忠而守忠別為一人耶姑識以備考

勅張守忠省所奏辭免南郊大祀加食邑恩命事具悉
朕恭修元祀丕闡緝儀均錫神釐用昭景貺眷惟舊弼
宜被恩榮頒邑加田茲為舊典其祇成命用副至懷所

請宜不允故茲詔示想宜知悉

賜王喚乞在外差遣不允詔

案集中前有王喚充寶文閣學士知

平江府制內有項貳冬官抗章引疾之語是喚蓋以工部侍郎而引疾乞外也是詔當在未除平江之先因喚有此請故降詔留之後復陳乞乃有平江之命耳

勅王喚審所奏乞除在外合入差遣事具悉卿早以材猷備更事任須加識擢進列從班望實具孚聲華彌茂方有資於啓沃用克副於選求茲遽抗章引疾請外殊非所望良用憮然既難徇於沖懷宜深體於眷意其安

厥位勿復有陳所請宜不允故茲詔示想宜知悉

賜王暎乞除小郡不允詔

案前詔在未補外之先此詔在已補外之

後考宋史全文續通鑑載暎由知秦州內擢在紹興十年又載十二年暎為江南東路轉運使獻本司錢十萬貫銀五萬兩以充奉迎兩宮之資是暎除平江當在十一年間不久即遷轉運也蓋暎與秦檜姻婭故躡膺仕如是其速陸游老學庵筆記云王會以秦檜婦弟為檜門十客中之親客暎與王曦王哲字皆從日當均為會之兄弟歟附識於此

勅王暎所奏辭免新除寶文閣直學士知平江府恩命乞除近下職名付以小郡事具悉朕重藩宣之寄優侍

從之臣內閣隆名式昭異數卿才行之美能世其家自
歷禁塗益隆譽處茲緣請外勉徇懇情俾分名郡之符
乃進西清之秩既頒成命宜即欽承所請宜不允故茲
詔示想宜知悉

賜成閔辭免恩命不允詔

案宋史載閔於紹興
二十四年拜慶遠軍

節度使尋丁母憂詔起復贈其母鄭國夫人不
載閔封開國公事是詔云恭修元祀蓋二十五
年郊赦時恩命也其母贈鄭
國當亦在此時耳附識於此

勅成閔省所奏辭免加食邑食實封開國公恩命事具

欽定四庫全書
卷六
悉朕丕闡盛儀恭修元祀董司警衛實賴忠勤熙事迄
成褒章斯舉增爰田之賦疏公社之封渙渥既行謙冲
難徇往祇成命用副眷懷所請宜不允故茲詔示想宜
知悉

賜成閔再辭免加恩不允詔

省表具悉朕丕闡彌文恭修元祀董司警衛實賴忠勤
肆舉褒章時為舊典已頒成命難徇遜辭所請宜不允
仍斷來章

賜張子蓋辭免恩命不允詔

案宋史列傳子蓋張俊從子初從韓

世忠討苗補承務郎累遷至御前諸軍都統制
紹興二十一年高宗幸俊第授子蓋德安軍節
度使不載其封開國公觀前詔有遵累朝之成
憲嚴三歲之明裡語後詔有夙懷勁勇久効忠
勤之語當為二十五年郊赦恩命蓋高宗六舉
郊祀之典自十三年始其後每三年一舉若在
初舉則詔不應有三年之語才邵以十六年出
知漳州至二十五年始內召仍直學士院尋拜
尚書不久乞祠則十六年至二十二年郊赦才
邵不在掌制之列且夙懷久効是子蓋已罷攻
戰以後語可斷其為二十
五年時事也附考於此

勅子蓋省所奏辭免進封開國公加食邑食實封恩命

事具悉朕遵累朝之成憲嚴三歲之明禋緝典告成殊
休茂渥肆博施於慶賜以加惠於臣工眷惟分闡之良
宜懋出綸之寵併昭邦數敷錫恩榮成命既行謙辭難
徇往其欽受用副至懷所請宜不允故茲詔示想宜知
悉

賜張子蓋再辭免恩命不允詔

省奏具悉朕以明禋克舉慶賜務均肆敷錫於茂恩以
丕昭於至意卿夙懷勁勇久効忠勤任當帥閩之隆宜

示褒章之寵式昭舊典爰增賦田勿用固辭往祇成命
所請宜不允仍斷來章

賜吳璘辭免恩命不允詔

案是詔當亦紹興二
十五年郊赦加恩與

張子蓋等諸詔
同時並下者

勅吳璘省所奏辭免加食邑食實封恩命事具悉朕率
循舊典祇存明裡既仰荷於監臨遂備膺於貺施爰推
大賚均及多方矧惟分閩之良宜播揚庭之冊肆舉行
於邦數以並受於神庥遽覽封章欲回渙渥雖嘉謙避

難徇忱辭其即欽承用副眷意所請宜不允故茲詔示
想宜知悉秋熟卿比平安好遣書指不多及

賜吳璘辭免恩命不允詔

案宋史載紹興十四年璘為御前諸軍都

統制渡江以來未有使相為都統制者時璘已為開府儀同三司故改命之而未詳其拜開府儀同三司在何年當亦在二十五年間也附識於此

勅吳璘省所劄子奏辭免除開府儀同三司加食邑食
實封恩命事具悉功大者賞隆所以謹厲世之具才高
者位重所以持馭貴之權眷惟將帥之賢宜茂褒嘉之

典弭性資勁勇智略精明威足以折衝謀足以決勝屢
宣師律克奏膚功深念忠勤敢忘寵賜俾視儀於宰路
以增煥於齋壇成命既行師言咸穆遽披奏牘難遂謙
懷亟對恩榮無庸辭遜所請宜不允故茲詔示想宜知
悉秋熱卿比平安好指不多及

賜吳璘再辭免恩命不允詔

勅吳璘省所上表辭免開府儀同三司加食邑食實封
事具悉爵貴度德賞宜當功厲世之具莫先於此朕率

是褒勸臣工以卿稟勁勇之資懷忠勤之操躬履行陳
屢立戰功禦侮折衝為時良將是用圖其績效寵以殊
榮位比峻於台躔儀遂同於揆路恩非虛授義豈容辭
荐閱所陳難以俯徇其祇成命以副至懷所請宜不允
不得再有陳請故茲詔示想宜知悉秋令卿比平安好
遣書指不多及

賜吳璘辭免恩命不允詔

勅吳璘省所奏辭免轉一官恩命事具悉卿以傑才久

膺閫寄屢著戰多之績共推威望之隆茲進職於武階
以顯榮於懋賞實符公論豈可固辭其體眷懷往祇異
數所請宜不允故茲詔示想宜知悉夏熱卿比平安遣
書指不多及

賜湯思退辭免恩命不允詔

案宋史宰輔表紹興二十五年六月

湯思退自禮部侍郎遷端明殿學士除簽書樞
密院事十月兼參知政事二十六年五月進知
樞密院事詔中有項簽密
畫進總機庭語即其時也

省所劄子奏辭免知樞密院事恩命事具悉鴻樞取幹

化之名右府合本兵之地實有資於長策以協贊於沈
 幾必得傑才克膺重任以卿明謨經遠深識造微負絕
 俗之英姿蘊折衝之妙略頃簽密畫備罄嘉猷進總機
 庭俾專武柄師言咸穆成命惟行茲覽遜函殊非朕意
 其祇茂渥毋復固辭所請宜不允故茲詔示想宜知悉

賜吳蓋辭免恩命不允詔

案集中有吳蓋除節
 度使制此因辭免復

降是
 詔也

勅吳蓋省所奏辭免新除武寧軍節度使進封開國公

加食邑食實封恩命事具悉卿才行俱高實惟懿戚宜
加寵擢俾擁節旄因示至懷備章寵數率由懿憲允協
師言成命既頒豈容遜避往其祇服茂對恩榮所請宜
不允故茲詔示想宜知悉

賜吳蓋再辭免恩命不允詔

省表具悉卿稟資端重率禮溫恭實惟后族之良宜受
齋旄之寵爰加敷數以示至恩既誕舉於褒章固難還
於渙號往祇成命勿復牢辭所請宜不允

賜周三畏辭免恩命不允詔

案集中有賜周三畏辭真除刑部侍郎

郎恩命詔至是復有尚書之命故詔云復長秋官庶資圖舊之求也附識於此

省所奏辭免除刑部尚書乞差在外宮觀事具悉卿碩德鎮浮宏才濟務頃持從橐備著聲華平反之能弼教惟允茲疇雅望復長秋官庶資圖舊之求用副明刑之意既頒成命實穆師言渙號惟行謙懷難徇毋勞遜避往其欽承所請宜不允故茲詔示想宜知悉夏熱卿比平安好遣書指不多及

賜周三畏辭免恩命不允詔

案此詔當周三畏卒辭刑部尚書之

後乃以是職予宮觀故詔云深諒誠懇理難以違俾就佚於真祠遂升華於內閣也附識於此

勅三畏省所奏辭免新除敷文閣學士恩命事具悉尚書總國綱維其任為重方資舊德復踐厥官茲覽露章力辭以疾深諒誠懇理難以違俾就佚於真祠遂升華於內閣實惟異數用示至懷往其欽承毋勞遜避所請宜不允故茲詔示想宜知悉夏熱卿比平安好遣書指不多及

賜湯鵬舉辭免恩命不允詔

案宋史全文續通鑑載紹興二十五

年四月秦熈自建康還過平江守臣湯鵬舉伺候送迎甚謹是年十月以直龍圖閣與陳誠之魏良臣沈該並召迅赴行在十一月以後至二十六年三月稱殿中侍御史湯鵬舉歷載其奏逐秦檜姻黨凡三十餘人五月以後則書御史中丞湯鵬舉二十七年二月書御史中丞湯鵬舉參知政事八月知樞密院事十一月罷為資政殿學士提舉在外宮觀以葉義問疏論其罪詔罷職蓋鵬舉初亦逢迎檜子及至被召除侍御史時檜已死故所論劾皆檜黨他亦無所建白又嘗論張浚身在草土名繫罪籍要譽而論邊事不恭而違詔書乃希万俟卨湯思退之意在臺垣年餘驟致政府終於罷斥殆亦不為時論所右云其除御史中丞當即在二十六年四

月也因史無傳故
附載其詳於此

勅鵬舉審所奏辭免新除御史中丞恩命事具悉朕寅
奉圖基講明治道乃廣開於言路俾庶政於維新思得
剛方直諒之士當耳目之寄以振舉臺綱維持國是卿
德博器全才高慮遠堅正之操深協朕心是用登崇擢
居憲府英姿玉立勁氣霜嚴盡掃弊端力排私黨既官
儀之整肅致朝著之一清載嘉納忠宜以褒進爰陟中
司之峻用昭眷遇之隆往體至懷益攄賢業抗章懇避

難徇謙辭所請宜不允故茲詔示想宜知悉

賜湯鵬舉辭免銀絹恩命不允詔

案是詔當即鵬舉初除中

丞時有銀絹之賜詔云肆舉行於舊典用昭示於殊恩思想亦當時故事非特賜也

勅鵬舉省所奏辭免銀絹三百匹兩恩命事具悉卿風猷凝遠氣節端方持憲南臺備宣忠讜茲擢升於專席式彰圖任之隆宜有匪頒以將厚意肆舉行於舊典用昭示於殊恩其體眷懷無勞辭避所請宜不允故茲詔示想宜知悉

賜湯鵬舉辭免恩命不允詔

案宋史職官志臺諫兼侍讀自慶厯以來

或用臺丞臺長未有兼者紹興十二年万俟卨以中丞兼羅汝楫以諫議兼自後每除言路必兼經筵檜死始罷宋史全文續通鑑載紹興二十六年正月以翰林學士陳誠之兼侍讀自秦熈侍經席多以臺諫兼講讀至是悉命從官如舊制是臺諫兼講讀自秦熈始矣鵬舉召為侍御及升中丞在檜沒之後是時講筵已不用臺諫詔詞有俾侍清閒之燕及率由於舊章之語當在罷樞務除資政殿學士之時耳附識於此

勅鵬舉省所奏辭免兼侍讀恩命事具悉列聖貽謨昭垂大訓是為成憲敢怠遵承進讀邇英正資碩望以卿

誠存直諫氣稟剛方貫穿竹素之傳妙極天人之致俾侍清閒之燕備陳道德之言蓋將率由於舊章豈特奉行於故事其膺明命勿復牢辭所請宜不允故茲詔示想宜知悉

賜王彥辭免恩命不允詔

案宋史列傳載彥紹興三年敗劉豫軍於

漢陰張浚承制進彥保康軍承宣使彥不受五年差知荆南府充歸峽荆門公安軍安撫使六年知襄陽府京西南路安撫使尋為浙西淮東沿海制置副使七年坐貶秩旋復洪州觀察使知邵州入辭帝曰以卿能牧民故付卿便郡行即召矣九年卒于官未言為保寧軍承宣使也

或康字乃寧字之訛然保康保寧迥然兩軍且
史稱高宗即位才邵以親老歸養十年不出其
召為祕書丞歷中書舍人兼權直學士院當在
紹興六七年間彥進保康承宣使時才邵方在
告安得有掌制誥之事况張浚承制進彥官乃軍
前便宜權授未為真除彥已不受未必降詔慰
留疑六年時未除制置副使之先已有承宣保
寧之命否則七年由制置降秩而為承宣史偶
闕書耳附
識以備考

勅王彥審所奏辭免新除保寧軍承宣使恩命事具悉
以卿蘊乘機之妙略負禦侮之宏才制勝出奇備宣忠
力茲示褒功之意擢升使組之崇寵數優隆是為懋賞

抗章辭避豈副朕期欽奉訓言亟承殊眷所請宜不允
故茲詔示想宜知悉秋熟卿比平安好遣書指不多及

賜姚仲辭免恩命不允詔

案文獻通考宋沿唐制方鎮有節度觀察

使留後政和七年詔觀察留後乃五季藩鎮以所親信留主後務之稱不可循用可冠以軍名改為承宣使無定員又云節度承宣觀察團練防禦刺史俱無職任特為武臣遷轉之次耳宋史吳璘傳載姚仲為璘部將屢有戰功及原州之敗璘奪仲軍械繫河池獄蓋紹興三十二年事也其餘承宣使當在二十六年璘為御前諸軍都統制時耶附識於此

勅姚仲省所奏辭免新除清遠軍承宣使恩命事具悉

以卿性資果毅志節沈雄御衆總戎休功夙著擢自廉
車之任峻升使組之華用示殊恩實惟異數比觀奏牘
乃欲懇辭渙號既孚冲懷難遂往祇茂渥勿復有陳所
請宜不允故茲詔示想宜知悉秋熟卿比平安好遣書
指不多及

賜田師中辭免恩命不允詔

案文獻通考張俊以岳飛賜死遂薦

其將田師中掌飛兵詔以師中為御前都統制
駐鄂州宋史張俊傳載俊屢敗金師師中皆與
有勞紹興十一年俊拜樞密納所統兵議賞宿
毫功師中與王德等六人首受上賞其加恩食

邑當即在鄂時也惜史無傳無從得其始末姑附識以備考

勅師中省所奏辭免加食邑食實封恩命事具悉朕肅舉精裡用嚴大報升煙展事奠玉薦誠格眷佑於神靈肆博施於祭澤惟是出綸之寵宜先分閭之良茲率舊章丕昭至意既頒成命難徇謙辭往其欽承茂對休渥所請宜不允故茲詔示想宜知悉夏熱卿比平安好遣書指不多及

賜程克俊辭免恩命不允詔

案宋史宰輔表詔
興十二年十月程

克俊自翰林學士遷端明殿學士除簽書樞密院事尋兼權參知政事十三年六月罷簽書依前職提舉洞霄宮宋史全文續通鑑則載克俊以翰林學士兼侍講翊善簽樞密宋朝事實則云自翰林學士承旨朝奉郎除端明殿學士簽書樞密院事兼權參知政事十三年二月罷權參知七月罷簽樞密三書所載克俊原官互有異同而罷參知罷樞密史與事實亦異且史稱依前職提舉洞霄宮而第三詔乃有辭資政殿學士之文則克俊乃罷為資政殿學士提舉洞霄宮非前職也

附識以備參考

勅克俊省所奏劄子奏辭免新除參知政事恩命事具悉卿以經邦遠業名世宏才自歷清塗即隆譽處項由

禁從進預樞庭備罄謀謨密贊籌幄英姿偉望中外具孚茲自輔藩入參大政方資耆傑增重本朝庶楙嘉猷協濟至治抗章辭避豈所望哉渙號已孚難徇冲尚其祇承命用副登崇所請宜不允故茲詔示想宜知悉

賜程克俊再辭免恩命不允詔

省表具悉朕惟至治之世必有同德之臣效忠協謀參贊大業相與都俞於廟堂之上而化行事立有生蒙休朕甚慕之是用圖任舊人共熙庶績惟卿懋德嘗弼予

治籌帷密畫備罄嘉謨啓沃之忠不忘告后茲加登用
陪預政機尚冀收功繼美前古既頒成命昭示至懷露
章固辭理難俯徇往其祇服毋復重陳所請宜不允仍
斷來章

賜程克俊辭免恩命不允詔

勅克俊省所劄子奏辭資政殿學士提舉臨安府洞霄
宮任便居住恩命事具悉朕圖任舊人共熙庶政卿以
碩德參贊機密方資謀謨以弼予治茲遽引疾力正奉

祠深諒忱誠勉從所請升華祕殿用致眷懷成命既行
無勞遜避所請宜不允故茲詔示想宜知悉

賜汪勃辭免恩命不允詔

案宋史宰輔表紹興十七年四月汪勃自

御史中丞遷端明殿學士除簽書樞密院事十八年二月兼權參知政事七月罷簽書未言其奉祠是詔乃答其免知湖州依舊宮觀故詔文有茲從琳館起殿輔藩之語考宋史全文續通鑑載十八年八月汪勃提舉江州太平興國宮是勃於七月罷簽書而八月乃奉祠也然才邵於十六年出知漳州至二十五年始召還中間無掌制之事則勃起知湖州當亦在二十五年以後詔云是惟圖舊之求知勃蓋廢棄已久矣考勃曾誣劾張闢洪邁以媮秦檜其後必有以

得罪於檜者故遭擯斥檜死
之後始得復用耳附識於此

勅汪勃省所劄奏辭免知湖州依舊宮觀事具悉卿頃
以碩德位登弼臣陪預樞庭參贊密畫茲從琳館起殿
輔藩是惟圖舊之求克副惟良之選肆頒成命允協師
言比覽露章懇祈遜避志雖嘉於謙退令難寢於惟行
宜體至懷往其欽受所請宜不允故茲詔示想宜知悉
秋熱卿比平安好遣書指不多及

賜陳康伯辭免兼修玉牒恩命不允詔

案宋史
職官志

紹興十二年始建玉牒所以宰執為提舉以侍從
官一人兼修考康伯傳康伯以八年遷司勳郎
中在省郎五年始遷軍器監充金使館伴言者
以生事論罷知泉州秩滿奉祠十年檜死起知
漢州尋除吏部侍郎旋登執政未言其兼修玉
牒且未嘗為侍從之臣詔云聳禁塗之重望擢
藝苑之英標則是時康伯乃任館
職者傳特闕漏耳附識以備考

勅康伯省所奏辭免兼修玉牒恩命事具悉朕惟文字
之職史才實難况備紀於仙源且不昭於偉績是為大
典尤在得人卿器度深闔風猷凝遠聳禁塗之重望擢
藝苑之英標識造精微文推瞻蔚洞貫古今之體灼分

疑信之傳斷自朕心俾兼撰述方資秉筆忽覽露章選
任既宜謙詞難徇亟祇成命用副眷懷所請宜不允故
茲詔示想宜知悉

賜士剴辭免恩命不允詔

案士剴不知何官宋
史宗室世系表亦無

其名詔云宗藩典司外籍
當亦有封爵而知外郡者

勅士剴省所奏辭免令任滿日與再任依例轉行一官
恩命事具悉卿以宗藩典司外籍秉心仁厚備著恪勤
爰申因任之恩仍加增秩之寵既頒成命難遂冲懷其

速欽承以副眷意所請宜不允故茲詔示想宜知悉夏
熱卿比平安好遣書指不多及

賜韋謙辭免恩命不允詔

案謙韋淵第二子顯仁太后之姪也宋史

韋淵傳止附載謙好學能詩官至建康軍節度使未言其封公制云嘗罹家棘已遂祥除當是淵沒後加恩故有是命也附識於此

勅韋謙省所劄子奏辭免新除太尉進封開國公加食
邑食實封恩命事具悉朕奉長樂之慈顏厚外家之懿
戚爰推褒數用率典常以卿德履粹純性資端慤念嘗

罹於家棘今已遂於祥除寵加掌武之金章增煥總戎
之齋鉞疏榮公社衍食爰田成命既頒宜體至意尚何
辭避其速欽承所請宜不允故茲詔示想宜知悉

賜韋謙再辭免恩命不允詔

省奏具悉朕恭承統緒欽奉母慈隆寵異於外家用光
昭於至德卿克全素行為時懿親屬甫御於祥琴宜誕
敷於顯冊汗其明號式云殊恩揚於廣庭已孚羣聽豈
容辭避當速祗膺所請宜不允

賜韋謙第三辭免恩命不允詔

省表具悉卿性全真粹德秉溫恭喜務學以知新能體
謙而自牧輝映外家之美雍容戚畹之英茲茂舉於褒
章用丕昭於眷意惟明綸之既布豈渙汗之可回再列
冲懷殊稽朕命往其祗服以稱恩榮所請宜不允仍斷
來章

賜董先辭免恩命不允詔

案董先出處無考詔
云嘗總廂部兼駕廡

車當由四廂指揮兼觀察使而除承宣者宋史
職官志謂政和七年易觀察留後為承宣使然

考南渡以前未有除承宣使者是詔有項因留
務之職易以使名之語則承宣之名乃紹興始
有之史或誤也

附識以備考

勅董先省所奏辭免新除建寧軍承宣使恩命事具悉
國家項因留務之職易以使名資其威重以卿嘗總廂
部兼駕廉車克著勤績故舉以命汝汝其承命祇服恩
榮毋勞辭避所請宜不允故茲詔示想宜知悉夏熟卿
比平安好遣書指不多及

賜趙密辭免恩命不允詔

案宋史列傳載紹興
十一年密為神龍衛

四廂都指揮主管侍衛步軍詔云殿巖之職衛
茲壇壝正其職也當亦十三年郊赦加恩之命

附識

於此

勅密省所奏辭免加食邑食實封恩命事具悉朕躬致
明禋丕昭盛典屬爾殿巖之職衛茲壇壝之嚴爰錫渙
恩式敷祭澤申加采邑併行真腴用示褒嘉豈容遜避
往祇新渥茂對殊休所請宜不允故茲詔示想宜知悉
賜趙密再辭免恩命不允詔

省表具悉朕躬致明禋丕昭盛典式孚祭澤爰賜渙恩

用示褒崇豈容遜避往祇承命茂對殊休所請宜不允
仍斷來章

賜蘇符辭免恩命不允詔

蘇符字仲虎軾之孫也詔故有名臣之後

能世其家之語符後為禮部尚書以忤秦檜罷見宋史秦檜傳中

勅蘇符省所奏辭免除敷文閣直學士恩命事具悉內
閣所以奉列聖之貽謨邃在西清最號嚴近隆名所加
時之高選非得其人不以輕付卿性全真粹學有本源
議論雍容詞章華潤名臣之後能世其家明命既頒實

孚羣聽惟令之行義豈容辭祇服訓言亟膺茂渥所請
宜不允故茲詔示想宜知悉秋熟鄉比平安好遣書指
不多及

賜折彥質辭免恩命不允詔

案宋史宰輔表紹興六年三月折彥

質自左朝議大夫試兵部尚書諸路軍馬事都督府參謀遷端明殿學士除簽書樞密院事十二月罷宋朝事實則云罷提舉洞霄宮宋史全文續通鑑所載亦然茲觀詔文雖有內外之殊俱膺眷倚之重遂陪樞府實預政機茲分方面之權忽總兵民之寄是彥質出知洪州即在罷樞密之時未嘗斥奉祠也宋史全文續通鑑又載十五年九月折彥質郴州居住或其知洪州

後乃予祠至是又謫

郴州耳附識於此

勅彥質省所奏辭免知洪州乞改除領一小壘差遣事
具悉入則贊帷幄之謀以弼予治出則當藩屏之任俾
安吾民雖有內外之殊俱膺眷倚之重卿厚德鎮浮宏
才絕俗聲華茂著士論攸歸頃副選求清途徧歷遂陪
樞府實預政機茲分方面之權忽總兵民之寄方資共
理佇奏顯庸胡為抗章乃伸懇請雖嘉謙牧殊非所期
其體至懷宜安厥位所請宜不允故茲詔示想宜知悉

冬寒卿比平安好遣書指不多及

賜陳誠之辭免恩命不允詔

案宋史宰輔表載
紹興二十六年九

月陳誠之自敷文閣學士同知樞密院事宋史
全文續通鑑則載二十六年正月癸丑翰林學
士陳誠之兼侍讀九月乙巳翰林學士兼侍讀
陳誠之同知樞密院事未言其為敷文閣學士
詔云擢從菴禁進列鴻樞當
以全文所稱翰林學士為正

勅誠之省劄子奏辭免除同知樞密院事恩命事具悉
朕登崇碩望圖回事功庶資同德之良共濟丕平之治
乃眷機微之寄實陪帷幄之謀宜得傑才以當重任卿

性全粹真識造幾深懷經世之英姿負康時之妙略肅
奉大廷之問優為多士之先出疆擅專對之美視草盡
代言之能茲擢從於鼇禁俾進列於鴻樞斷自朕心協
於輿論佇觀成績式究遠猷忽覽遜詞祈還成命雖嘉
退尚難徇忱辭往其欽承勿復有請所請宜不允故茲
詔示想宜知悉

賜陳誠之再辭免恩命不允詔

省表具悉登俊任賢式隆邦國之治協謀至理正資廊

廟之才眷惟樞庭實總軍政當斯重寄宜屬時英卿性稟純明德全宏博學貫天人之奧詞敷黼黻之華蘊文武兼資之才負剛大直養之氣進陪密畫允協師言方賴告猷佇觀遠業茲披奏牘乃欲懇辭雖諒謙撓難回成命其體至意勿復有陳所請宜不允仍斷來章

賜趙令務辭免恩命不允詔

案令務之名不見於世系表考令字

自太祖而下為第六世至南渡以後其輩行已少令務以宗藩觀察明州詔云耆年碩德其時當亦既老而封爵未除宜亦高宗近屬表乃竟佚其名則其闕漏正復不少矣附識以備考

勅令務省所奏辭免新除明州觀察使安定郡王恩命
事具悉朕嗣守丕基以恩睦族爰錫寵光之渥用昭惇
敘之仁以卿有信厚之風勵清修之操耆年碩德為時
宗英俾駕廉車仍加封爵茲率彝典因示眷懷成命既
行豈容遜避宜體至意其速欽承所請宜不允故茲詔
示想宜知悉春暄卿比平安好遣書指不多及

賜万俟卨辭免恩命不允詔

案史載紹興二十
五年卨由歸州召

還尋拜尚書右僕射同中書門下平章事兼次
太后回鑿事實上之詔有致母后之回鑿成書

來上編次有倫及俾提宏綱之語當即禹提舉實錄院時上此書也然史未載進書恩命此亦

可與
互證

省奏具悉朕獲續丕基欽承眷命賴高穹之垂祐致母
后之回鑿備申孝養之懷實篤邦家之慶宜垂光於典
冊悉紀載於殊休卿以輔臣永資提領成書來上編次
有倫遂與日星粲然久照爰推寵數用示至懷乃抗封
章欲回成命揚庭發號羣聽俱孚義豈容辭亟其欽受
所請宜不允仍斷來章

賜万俟卨再辭免恩命不允詔

勅万俟卨省所劄子奏辭免除左銀青光祿大夫進封
陽武郡開國公加食邑食實封恩命事具悉朕致養東
朝日承慈訓惟是奉親之意靡不竭誠矧回鑾事實為
希世之榮觀是宜纂修不遺昭示盛美以侈無疆之慶
以為不刊之書以卿德茂望崇為時良弼肆加明命俾
提宏綱編次既工筆削惟允成書來上深愜朕心爰錫
寵章以褒殊績茲披奏牘乃欲懇辭信賞惟行豈容辭

避往其祗受勿復有陳所請宜不允故茲詔示想宜知悉

賜劉焄辭免恩命不允詔

案宋史劉貴妃傳妃臨安人父焄累官昭

慶軍節度使故詔云聯芳
戚畹為國懿親也謹附識

勅劉焄省所奏辭免除昭慶軍節度使進封開國侯加食邑食實封恩命事具悉以卿德望素高才猷兼敏聯芳戚畹為國懿親乃舉褒章丕昭隆眷俾分帥閩臨鎮侯藩開封社以增崇爰錫田而申衍既揚制綽允協師

言茲披懇避之辭殊拂寵加之意其祇新渥以對榮懷
所請宜不允故茲詔示想宜知悉

賜劉楸再辭免恩命不允詔

省表具悉朕操賞慶之權以褒勸羣工矧惟外戚之良
休有譽處登崇之典務致其隆卿飭已清修懷材敏給
茲疇望碩申錫恩榮乃復抗章懇辭寵渥冲懷難徇出
令惟行所請宜不允

賜劉楸第三辭免恩命不允詔

省表具悉卿聯榮姻戚望實素隆頃緣謙退之心遂處承流之任褒崇未稱為之歎然肆舉彝章爰加進律俾當屏翰肇建節旄方明命之誕揚既師言之咸穆屢形遜牘豈朕所期其趨奉承以副至意所請宜不允仍斷來章

賜万俟卨辭免恩命不允詔

案宋史宰輔表紹興二十六年五月

万俟卨自參知政事授左宣奉大夫守僕射同平章事

勅万俟卨省所劄子奏辭免新除左宣奉大夫守尚書

右僕射同中書門下平章事進封武陽郡開國侯加食
邑食實封恩命事具悉朕考觀前代隆平之治必有同
德協謀之臣道足以承天子而理萬幾才足以熙帝載
而宅百揆用能輔相乃辟克成厥功以卿名世傑才經
邦遠業肆加圖任進秉鈞衡惟茲求舊之宜允副具瞻
之望既頒成命難遂謙懷勿用固辭往祗茂渥所請宜
不允故茲詔示想宜知悉

賜万俟卨辭免恩命不允詔

案宋史全文續通
鑑紹興二十六年

右僕射万俟卨兼提舉實錄院先是秦檜以監修兼提舉至是始命沈該為監修卨為提舉後

因之皆分為二

云附識於此

勅万俟卨審所劄子奏辭免兼提舉實錄院詳定三司勅令恩命事具悉朕若稽古訓欽奉先猷惟時實錄之修蓋用編年之法紀一朝之大典與六籍以同符至於勅局之設官將以明訓而議法輕重之制憲令攸資凡茲提領之司皆屬鈞衡之任卿德隆望峻學博知明以經綸之才膺眷注之意肆頒成命斷自朕心其體至懷

勿煩謙遜所請宜不允故茲詔示想宜知悉

賜万俟卨再辭免恩命不允詔

省表具悉卿德備直方氣全剛大真廊廟之重器懋經
綸之遠圖自進秉於鈞衡益發揮於事業石巖巖而望
峻星兩兩以色齊庶政咸熙休功茂著俾纂修於盛典
以欽奉於慈顏煥然義例之明允矣簡編之富丕昭大
慶垂示無窮爰舉褒章務隆邦數遽披奏牘乃欲懇辭
雖諒謙懷難回成命亟其欽受以稱榮恩所請宜不允

賜万俟卨辭免恩命不允詔

宋史全文續通鑑
紹興二十六年

十二月右僕射万俟卨上重修貢舉勅令格式
五十卷詳看法意四百八十七卷此三詔正當

時所賜也
附識於此

勅万俟卨省所劄子奏乞重修貢舉法更不推賞事具
悉朕祇膺駿命欽奉先猷惟取士之科條期遵揚於成
憲爰加修纂務稱所求以卿位正機衡望隆耆碩實資
提領乃克成書宜加褒崇以昭至意思施所被其亟欽
承所請宜不允故茲詔示想宜知悉

勿復有陳所請宜不允故茲詔示想宜知悉

賜万俟卨第三辭免恩命不允詔

省表具悉朕惟貢舉之法邦之令典蓋周家之賓興唐
室之選舉所以網羅羣材以備登用至於國朝尤加意
焉然法有先後古今異宜參酌損益歸於至當必得其
人畢茲能事卿以輔臣總提條目成書來上深用歎嘉
賜推褒冊允協師言胡為露章乃欲遜避既頒明命難
遂冲懷所請宜不允仍斷來章

賜王權辭免恩命不允詔

案王權劉寶四詔亦郊赦加恩者考郊祀

皆冬至舉行而四詔中前詔皆云秋熱後詔皆云秋涼者想權寶均係外鎮頒到制書未免需時往復表辭乃又有答詔故先一年冬至恩命至次年秋復降此詔也前云秋熱當是七月後云秋涼則九月時矣二詔中間相距又兩月餘則二人之在遠鎮可知權與劉寶皆韓世忠部將見世忠傳附識於此

勅王權省所奏辭免加食邑食實封恩命事具悉朕報本奉先茲薦誠於元祀受釐拜貺宜錫福於多方故熙事之告成霈湛恩而廣被肆揚褒典加寵將臣用示眷

懷式遵彝憲忽披奏牘備列忱辭雖嘉自牧之謙難遏
推行之令往其欽奉勿復重陳所請宜不允故茲詔示
想宜知悉秋熟卿比平安好遣書指不多及

賜王權辭免恩命不允詔

勅王權省所奏辭免加食邑食實封恩命事具悉朕不
闡上儀式嚴大報陶器藁秭象乎天德之純金支翠旌
煥若樂容之盛既靈承於嘉貺肆敷錫於蕃禧乃眷將
臣宜膺顯冊茲惟邦數俾對神休胡為抗章欲回渙渥

其祇成命勿復有陳所請宜不允故茲詔示想宜知悉
秋涼卿比平安好遣書指不多及

賜劉寶辭免恩命不允詔

勅劉寶省所奏辭免加食邑食實封恩命事具悉朕秩
泰壇之祀仰荷碩勲受宣室之釐難專施貺廣推慶賜
以及寰區乃眷將臣宜膺褒寵卿當受秉鉞之任懷許
國之心方略素高忠勤久著肆加褒數以示榮恩祇服
訓言無勞辭避所請宜不允故茲詔示想宜知悉秋熱

卿比平安好遣書指不多及

賜劉寶再辭免恩命不允詔

勅劉寶省所上表奏辭免加食邑食實封恩命事具悉
朕祇膺駿命丕闡緝儀克配彼天推祖宗而並侑式序
在位行慶賜以均釐眷惟制閫之良夙受擁旄之寄恭
勤懋著勞績備宣載嘉衛社之忠宜有褒功之錫師言
咸允渙號既行抗疏以辭乃至於再茲非所望其速欽
承所請不允不得再有陳請故茲詔示想宜知悉秋涼

卿比平安好遣書指不多及

賜朱勝非辭免恩命不允詔

案宋史列傳稱勝非與秦檜有隙檜

得政勝非廢居八年卒均未詳年月宰相輔表載紹興四年九月勝非罷右相聽持餘服服闋除觀文殿大學士提舉洞霄宮宋史全文則載紹興十四年十一月提舉臨安府洞霄宮朱勝非卒是此詔乃十三年冬至始行南郊恩命其時勝非正以觀文殿大學士奉祠臨安故詔有嘗總政機之語也然則勝非罷廢蓋不止八年之久矣附識於此

勅勝非省所奏辭加食邑食實封恩命事具悉朕揆日
迎長升禋拜貺克成熙事茂擁神釐敷錫湛恩普逮臣

庶矧惟碩輔嘗總政機頒邑加田式遵常典抗章遜避
殊咈至懷成命既行往惟祇服所請宜不允故茲詔示
想宜知悉春暖卿比平安好遣書指不多及

賜沈該辭免恩命不允詔

案宋史宰輔表紹興二十六年五月壬寅

沈該自參知政事授左朝議大夫守左僕射同平章事

勅沈該省所劄子奏辭免新除左正議大夫守尚書左
僕射同中書門下平章事進封歸安郡開國侯加食邑
食實封恩命事具悉宣王復古資維翰之甫申漢帝厲

精賴有聲之邴魏從昔致治莫先得人朕選用羣才新
美庶政思與同心之碩輔共圖不世之極功眷惟耆英
宜輔台德爰延登於揆路俾翊亮於繁機既即廣庭不
揚渙號理難謙遜義在克承其體訓言勿稽成命所請
宜不允故茲詔示想宜知悉

賜沈該辭免恩命不允詔

案宋史全文續通鑑
紹興二十六年沈該

監修國史万俟卨提舉實錄院而是詔乃以監
修兼提舉者蓋初尚沿秦檜故事後因其固辭
遂分命卨為提舉而以該
專任監修耳附識於此

勅沈該省所劄子奏辭免監修國史兼提舉玉牒所恩
命事具悉朕載累朝之偉績為不刊之書莫重於國史
溯仙源之流慶示無疆之休備存乎玉牒設局雖異纂
修則同卿道覺民先智周事表學足以貫古今之變識
足以斷疑信之傳宏綱正賴於總提察吏得資於稟訂
矧惟舊典本屬宰司茲以命卿於理為允露章懇避豈
朕所期往其欽承用副至意所請宜不允故茲詔示想
宜知悉

者當即該監修國史時與万
俟高同上是書乃有命耳

省表具悉朕荷天明命垂監孝誠頃蒙駸駕之還獲奉
東朝之養乃纂修於事實以昭示於無窮大典既成盛
儀斯舉卿以輔弼實領總提之任典章嚴飭視聽增輝
既深副於朕心宜務隆於恩數載加顯冊用表眷懷茲
覽遜章欲祈懇避非予所望其勿重陳所請宜不允仍
斷來章

賜沈該再辭免恩命不允詔

勅沈該省所劄子奏再辭免除左宣奉大夫進封吳興
郡開國公加食邑食實封恩命事具悉惟天下之事體
既重則禮必盛禮既盛則賞必隆惟其稱爾豈可以論
其常哉朕恭惟母慈言還長樂正東朝之尊致天下之
養溫清定省得盡歡心惟其事實所當纂修既克成書
是為盛典欽奉之意務極尊崇提領緝儀必資碩輔所
以增重事體光昭大慶宜推恩渥以示褒嘉乃深執謙
恭再三懇免殊非所望未協朕心其亟欽承勿復固避

所請宜不允不得更有陳請故茲詔示想宜知悉

賜沈該辭免恩命不允詔

勅沈該省所劄子奏辭免除左宣奉大夫進封吳興郡
開國公加食邑食實封恩命事具悉朕以母后回鑾慈
寧致養茲為大慶得盡孝心惟事實之不昭宜簡編之
具載肆頒詔旨編輯不遺既克成書爰欽承奉乃涓吉
旦肇舉盛儀以卿望實俱崇時為元宰凡茲施措正藉
總提典禮之行咸得其敘乃推異數用示殊恩胡為抗

章祈寢成命已孚廷號義豈容辭亟其欽承以膺茂渥
所請宜不允故茲詔示想宜知悉

賜張綱辭免恩命不允詔

案宋史列傳載秦檜用事綱以徽猷閣侍

制引年致仕臥家二十年檜死召為吏部侍郎未言其參政考宋史全文續通鑑載紹興二十六年八月甲午張綱參知政事詔有擢從銓部參贊政機之語蓋為吏部侍郎後有是命也附識於此

勅張綱省所劄子奏辭免除參知政事恩命事具悉朕
稽古圖治恢隆事功選用羣材共熙庶政惟是輔弼之

臣謀謨之任允賴同心協契以佑乃辟措斯世於丕平
非夫經濟之賢何以副登崇之意哉卿德備直方氣全
剛大勁正足以厲俗端重足以鎮浮與學造於幽峻高
文冠於俊髦頃飛英於禁路乃抗志而辭榮朕所灼知
肆加召用擢從銓部參贊政機成命既頒師言咸穆方
資遠業允迪大猷露章懇辭豈朕所望亟其祗服勿復
有陳所請宜不允故茲詔示想宜知悉

賜張綱再辭免恩命不允詔

省表具悉朕省閱萬幾緝熙百度疇咨政事圖任維艱
以卿德履深純性姿全粹蘊經邦之遠業負濟務之宏
才靜退自將誠明自守聲猷夙振望實彌高爰擢從於
禁塗俾進參於政路庶賴協謀之益永恢致治之功既
播告於羣工固難回於成命茲尚辭遜殊拂朕懷勿復
重陳往祇茂渥所請宜不允仍斷來章

賜王侯辭免恩命不允詔

案王侯史無傳宋史全文續通鑑載紹興

五年權戶部侍郎王侯紹興七年則直稱戶部侍郎至二十六年仍稱戶部侍郎考宋時從無

久任不遷至二十餘年之官當是七年以前曾
為是職後更歷他任至是復除舊秩故詔云久
歷要途備揚顯績
也附識以備考

勅王侯省所奏辭免除戶部侍郎恩命乞一在外宮觀
差遣事具悉民部貳卿實計邦典必得通疏練達之才
兼全足國裕民之術其所寄委實難其人以卿德量深
閱材猷強敏學貫精微之會智周事物之原久歷要途
備揚顯績付斯重任允協師言方資進為式副慎選遽
披奏牘乃欲奉祠成命已行冲懷難徇往其祗服勿復

重陳所請宜不允故茲詔示想宜知悉

賜石清辭免恩命不允詔

案石清事蹟無考詔稱戚畹之良任上閣

之事蓋以戚族由閣門使而為是職者然考宋后妃無姓石氏者惟哲宗陳國公主下嫁石端禮清或即端禮之子弟行耶附識於此

勅石清省所劄子奏辭免除觀察使恩命事具悉卿性資端重德履純明以戚畹之良任上閣之事贊相儀矩雍容合宜克守溫恭備宣勤恪用深嘉於顯績肆申錫於殊休乃增使紱之華俾陟廉車之峻茲惟懋賞允協

師言胡為抗章欲以辭避其祗承命勿復有陳所請宜不允故茲詔示想宜知悉

賜韓仲通辭免恩命不允詔

案仲通事蹟無考詔云茲從近列出

殿南邦蓋以出知外郡而綰閣銜者非真除也

勅仲通省所奏辭免敷文閣直學士事具悉卿早以材猷備膺任使茲從近列出殿南邦以寵其行肆推彝典即西清之嚴邃聯內閣之隆名忽覽露章欲祈辭遜已頒成命其速欽承所請宜不允故茲詔示想宜知悉

賜李文會辭免中丞恩命詔

案前卷有李文會除御史中丞制此

乃因其表辭復降答詔也文會除中丞當在紹興十三年之末已詳前卷

勅文會省所奏辭免新除御史中丞恩命事具悉朕眷惟南臺風憲之府今以執法為長職任雄峻當得宿望用副虛懷以卿剛方有餘忠審不撓更歷言路振肅紀綱霜威凜然聳聞中外茲用疇其已試之効擢居專席之崇成命既頒毋煩遜避所請宜不允故茲詔示想宜知悉

賜秦熈辭免真除禮部侍郎恩命詔

案宋史全文續通鑑

紹興十二年賜熈進士第一宋史宰輔表紹興十五年十月秦熈知樞密院事通籍僅逾三年

已登政府其真除禮部侍郎當

亦不過一二年間也附識於此

勅秦熈省所奏辭免落權字恩命事具悉朕永惟帝王之功莫急禮樂之用惟是卿貳宜屬俊髦以卿蘊名世之才負致遠之器適禮文之修舉賴獻納之精詳申命為真允符公論其祇新渥勿復固辭所請宜不允故茲詔示想宜知悉

賜太傅韓世忠生日詔

案周必大玉堂雜記宰執及親王使相太尉生

日天章閣排辦牲餼預申學士院撰詔及寫賜目一紙各請御寶前一日差內侍持賜又云祖宗朝牲餼外又賜器幣過江後惟牲餼耳米麩本色羊準價酒則臨安釀造臨時加以黃封賜韓世忠以下十詔蓋當時故事也附識於此

頃從右府均逸真祠屬茲載誕之辰爰舉匪頒之式其膺寵數益保壽康今賜卿生日羊酒米麩等具如別錄至可領也故茲詔示想宜知悉

賜尚書右僕射万俟卨生日詔

稟純明之德負經濟之才象應台符任當鼎鉉協宣機
政調變化元茂隆熙績之功永致迓衡之治茲逢慶誕
之旦宜推寵錫之恩以介壽祺其膺眷意今賜卿生日
羊酒米麩等具如別錄至可領也故茲詔示想宜知悉
賜尚書左僕射沈該生日詔

高穹垂佑良月屆時是生名世之賢翊贊迓衡之治告
后罄謀猷之益調元收燮理之功台象增輝巖瞻愈峻
今日適逢於誕慶殊恩宜厚於匪頒祇服眷懷永綏壽

社令賜卿生日羊酒米麪等具如別錄至可領也故茲
詔示想宜知悉

賜少傅楊存中生日詔

惟昔噩夢之祥是生殿巖之帥總衆謹訓齊之法輸忠
宣夙夜之勤茲協始生宜加蕃錫特厚匪頒之式用昭
眷意之隆以介壽祺其祇寵渥今賜卿生日羊酒米麪
等具如別錄至可領也故茲詔示想宜知悉

賜參政張綱生日詔

性資夷粹識慮靚深懷經濟之全才負耆舊之重望擢
從禁近參贊政機備殫啓沃之誠優處疑丞之任當首
冬之良月逢慶誕之令辰爰厚恩頒其祇茂渥永介壽
祺今賜卿生日羊酒米麪等具如別錄至可領也故茲
詔示想宜知悉

賜參政万俟卨生日詔

躬稟傑才位隆近弼眷此凝寒之候適當誕毓之辰肆
示寵頒助迎壽祉今賜卿生日羊酒米麪等具如別錄

至可領也故茲詔示想宜知悉

賜樞密院湯思退生日詔

秋氣將中允協金行之正天心垂佑是宜賢佐之生秉全德以瑞時懋嘉猷而經遠當機庭之重任宣籌幄之明謨屆茲誕毓之辰錫以恩頒之寵用昭眷意永介壽祺今賜卿生日羊酒米麩等具如別錄至可領也故茲詔示想宜知悉

賜太尉韋謙生日詔

長夏屆時適應炎曦之候高門流慶是生戚里之英才

德兼全恩榮克稱宜厚匪頒之賜以彰眷遇之殊錫奉寵光益綏壽祉今賜卿生日羊酒米麩等具如別錄至可領也故茲詔示想宜知悉

賜太尉錢愐生日詔

躬全才德譽播親賢屬茲誕毓之辰適應發生之候宜頒寵錫以介壽祺今賜卿生日羊酒米麩等具如別錄至可領也故茲詔示想宜知悉

賜太師秦檜生日詔

案宋史全文續通鑑紹興十二年十二月癸未以太

師秦檜生辰錫宴於其第自是歲為例是詔止
羊酒米麪當在十二年以前尚依故事定制至
十二年乃就第賜宴始
為異數耳附識於此

宣王撥亂嶽降甫申炎德復輝勲高寇鄧稽諸載籍豈
若師臣獨幹化樞再安王室明謨高世成績格天屬茲
載誕之辰特厚匪頒之寵用昭恩眷益介壽祺令賜卿
生日羊酒米麪等具如別錄至可領也故茲詔示想宜
知悉

賜周三畏辭真除刑部侍郎恩命詔

案宋史全
文續通鑑

載紹興十一年三畏為大理卿與万俟卨等同鞠岳飛之獄其擢刑部侍郎當即在岳氏獄成

之後歟附識以備考

勅三畏省所奏辭免落權字恩命事具悉朕若稽大猷惟刑之恤秋官之貳實難其人以卿練達平反見於已試式符公論滿歲為真成命已行謙辭難徇宜體眷意其即欽承所請宜不允故茲詔示想宜知悉

賜孟忠厚乞除在外宮觀詔

案史載詹大方希秦檜意論忠厚表

辭輕侮遂罷為醴泉觀使檜死乃召還二詔當即其時也附識於此

器宇靚深風猷凝遠負經綸之偉望蘊康濟之全才入陪帷幄之謀備宣碩畫出當師帥之任茂著殊庸譽處之隆中外所仰茲從舊弼往殿輔藩蓋咨名德之崇增重鎮臨之寄方觀成績福及斯民諒裁決之有餘自優游而多暇遽馳奏牘乃欲奉祠載閱忱辭殊非所望其安厥位勿復有陳所請宜不允故茲詔示想宜知悉冬冷卿比平安好遣書指不多及

賜湯鵬舉乞宮觀不允詔

案宋史全文續通鑑載鵬舉於紹興二十

七年八月知樞密院事十一月罷提舉在外宮
觀是詔止稱遂冠南臺並欲論列秦頊等事則
是未知樞密之前曾有是請而未見允者考宋
史吳益傳益娶秦檜長孫女鵬舉劾其恃親昵
之勢驟躡美官乞褫職帝謂檜死日曾諭其妻
子許以保全若遽出其塔則傷恩臣僚無得論
列與詔中語相似當即此時鵬舉論益而並及
頊故詔云秦頊等也其事當在紹興二十五年
檜初死之後
附識於此

勅鵬舉省所奏乞除一在外宮觀差遣或小郡自效事
具悉全大臣之後人主所以隆恩持憲府之綱人臣所
以舉職惟上下之勢既已有異則可否之論因或不同

卿以剛勁之姿當糾彈之任揚歷言路遂冠南臺簡在朕心克著誠節茲者論列秦垣等職名事朕以秦檜輔佐之久又嘗許其家以保全之言理宜信示豈可中輟故因加告諭以表至懷然深諒所陳甚協公議卿能體此復何所嫌胡為抗章遽求去位其安厥次勿復固辭所請宜不允不得更有陳請故茲詔示想宜知悉

賜施鉅乞宮觀詔

案宋史宰輔表載鉅於紹興二十四年十一月自吏部侍

郎除參知政事二十五年四月罷以資政殿學士提舉太平興國宮詔稱出帥廣右蓋罷參知

後曾有出知廣西之命
乃乞奉祠也附識於此

勅施鉅省所奏乞差在外宮觀一次事具悉廣右介於
海嶺之間壤地阻遠惟是宣德意而求民瘼貴在得人
故於命帥尤致慎焉卿德望隆重性資通明比從禁塗
參贊大政謀猷啓沃備罄忠嘉茲用命卿往膺寄委實
資舊弼以慰遠民迺抗封章請祠就佚載惟斯志豈所
望哉其體至懷宜安厥位所請宜不允故茲詔示想宜
知悉秋涼卿比平安好遣書指不多及

賜魏良臣乞宮觀詔

案宋史全文續通鑑紹興二十六年二月魏良臣罷

參知政事出知紹興府故詔云輔藩正指紹興也

勅良臣省所劄子奏乞一外任宮觀差遣事具悉卿名世宏才康時遠業入參機務既協贊於明謨出殿輔藩以布宣於政化實資明德之盛增重師帥之權諒裁決之有餘自燕私之多暇茲披奏牘祈奉真祠遽欲丐閒甚非所望朕之待遇臣下初無內外之殊卿其勿倦撫綏當體眷懷之厚宜安厥位毋復有陳所請宜不允故

茲詔示想宜知悉秋熱卿比平安好遣書指不多及

賜万俟卨乞在外宮觀詔

案宋史全文續通鑑
紹興十四年二月參

知政事万俟卨罷提舉江州太平觀以與秦檜
有隙為李文會詹大方等所劾再疏求去故有

是命附
識於此

勅万俟卨省所劄子奏乞罷免參知政事除一在外宮
觀差遣事具悉朕惟政府機務之繁實資近弼協謀參
贊卿以材猷允膺茲任遽陳奏牘堅請奉祠茲閱來章
豈朕所望其安厥位用副至懷所請宜不允故茲詔示

想宜知悉

賜程克俊乞宮觀詔

案宋史宰輔表載紹興十二年十月程克俊自翰林

學士遷端明殿學士除簽書樞密院事尋參知政事十三年六月罷提舉洞霄宮以後不載克俊再除參知而詔乃有再登政路之語考宋史全文績通鑑紹興十二年十月克俊以草奏檜除太師制有廟算無遺固衆人之所不識征車遠狩惟君子以為必歸語檜大喜即權克俊簽書樞密院事十三年六月罷提舉安洞霄宮二十六年六月自知湖州再參知政事八月再提舉臨安洞霄宮是詔蓋二十六年所降者也附識於此

勅克俊省所劄子奏乞宮觀事具悉卿以宏才再登政

路辰猷入告備罄忠嘉參贊繁機正資舊弼茲披奏牘引疾就閒雖出懇誠良非所望勿藥之喜指日可期勉加保調以副虛佇所請宜不允故茲詔示想宜知悉

賜莫將乞宮觀詔

案莫將史無傳宋史全文續通鑑載紹興八年以司農寺

丞賜同進士出身除起居郎詔云輟從鳴玉之班往任分符之寄此時當是以館職出知外郡乃有奉祠之請也附識於此

勅莫將省所奏乞除在外一宮觀差遣事具悉朕誕膺駿命寅奉丕圖軫念元元選求共理卿以宏才偉望簡

在朕心輟從鳴王之班往任分符之寄方資實德施及
斯民遽請奉祠殊非所望顧郡務雖劇然才力有餘惟
既乃心何憂不濟其安厥職用副至懷所請宜不允故
茲詔示想宜知悉春寒卿比平安好遣書指不多及

